

欽
定
全
唐
文

欽定全唐文卷四百三十七目錄

鮑防

問津臺賦

歌響過行雲賦

王緯

代路尚書賀登極表

代路冀公謝旌節等表

代陳司徒謝敕賜麟德殿宴百僚詩序表

謝賜中和節御製詩序表

請停徵浙西雜罰錢疏

對庶子牲祭失禮判

對士祭判

對縣令有客判

盧正已

請定杖法奏

史元璨

帝袷議

李勉

廚院新池記

滑州新驛記

李陽水

對元日懸象稅千畝竹判

上李大夫論古篆書

唐李翰林草堂集序

縉雲縣城隍神記

惡溪銘

庶子泉銘

忘歸臺銘

冀邱縣令庾公德政碑頌

并序

欽定全唐文卷四百三十七

鮑防

防字子慎襄州襄陽人第進士厯佐幕府入爲職方員外郎代宗朝拜左散騎常侍從德宗幸奉天進禮部侍郎封東海郡公授工部尚書卒年六十九贈太子少保諡曰宣

問津臺賦

惟歲臨乎甲午余經蔡以遊陳見歸然之故臺沒路隅之荒榛側聞夫子於此問津敢問夫子何負於人栖栖夫子魯不容身乃泣然而出涕聊託辭以自申元黃之初萬物

為銅形象既著造化無功匪伊無功不宰其中禮樂之初

崩壞未正詩書既出夫子無命匪伊無命不耀其聖向使

魯同季氏

一作季孟

齊等田常貪浮雲之不義忘夕露之灑灑

豈無十室之邑亦有三家之堂奚自衛而反魯每困窮於

路旁浩浩其天茫茫其野近不見於文武遠不逮於虞夏

彼通津與直道故無得而知者已矣夫子時乎時乎進皆

鳥獸之羣退異沮溺之徒霜雪昏其大澤荆棘穢其通衢

撫川陸之難險憫人世之崎嶇方太公迷殷遇文王伊尹

迷莘遇成湯何夫子之不遇處昏濁而遂亡永追想於遺

跡遂投弔於寒荒

歌響過行雲賦

與元氣相合與太虛相雜此雲之所吐納巉巖奇峰蜿蜒
真龍此雲之爲形容其有含商咀徵節其行止以乖刺於
天理然而天無情道無營四時感而運行萬物感而發生
苟吾人之感激遂凝思於至精彼天地猶見應況白雲之
英英繇是漑盥心術混和天倪權機不發正性不攜息真
氣以足踵激清聲於瓠犀四氣旣交五聲大戛以咽喉爲
管磬以唇吻爲控揭忽頓挫而高歌遂盤跚於塊北上如

抗下如墜極高天蟠厚地魚奮鬚鳥騰翅混莽渺而清泠
入虛無而密緻彼雲澶漫萬族連延一空出虛無以布濩
淹寂寥而鴻濛旣如蓋而如馬亦自西而自東歌者於是
噬嗑其頤吮吐壘麓氣調萬象口運四時奏羽商而寒光
冽冽動角徵而春色熙熙聲欲斷而復續若貫珠之累累
一成而芳氣初振風篁未韻彼雲尚徘徊希微出入無依
若往未定將行不飛再成而逸思奔壯正聲寥亮彼雲漸
應曲往來從風下上三成而充塞人寰洋溢無閒在水徧
水在山滿山彼雲忽應聲赴節雷奔霧集前者山立後者

山岌力大不可以動搖噫氣不可以噓吸風北不北風東
不東輪囷杳影泱泱長空矗如河漢屹若華嵩天輪轉而
不動地籟寂而不窮沈悠悠之寒水浮習習之涼風浮沈
異勢高下萬里願一致於青雲亦何階而望此及其調苦
聲切歌長意深天乎有耳雲也無心果凝影而不散爲歌
者之知音是知志同則千里而應不同則造膝而悖谷爲
律而成暄日因戈而不沒苟精誠之激厲信感應於倏忽
則有花裝袿服楚艷陳娥妖姿膩理慢臉橫波珊珊佩玉
粲粲垂羅務淫哇之巧笑詫激楚之嬌歌曲未離於咫尺

雲已邈於山河假使勢雖迴天力雖拔山影則可望雲不可攀思欲騁庸音之靡曼過仙雲之往還亦何難哉向使善亦過雲否亦過雲妍媸一貫邪正不分則善歌者望風而結舌肯闢茸於哀哇之羣哉

王緯

緯字文卿并州太原人舉明經以書判入等累官彭州刺史檢校庶子兼御史中丞西川節度營田副使貞元中檢校工部尚書十四年卒年七十一贈太子少保

代路尚書賀登極表

必由其化陰陽不測聖人能爲之節然後垂文章以鼓天下之動張宴樂以導天下之和三五以還盛美斯在伏惟陛下以道御物以文成化立言盡經緯之本秉筆節陽和之中雖天旨元深理絕於彌度而睿詞煥洽義歸於德劭文輝三象諧同六律邁殷湯之晨露掩虞舜之薰風皇太子以聰哲之姿篆隸之妙鸞鳳之勢鍾王莫儔臣備守外藩獲承殊獎荷此非常之賜實唯希代之寶窺觀則河漢無極負戴則山岳爲輕沈族捐軀何階上答不勝欣感之誠謹獻應制詩一首章句疎蕪義理鄙淺君唱臣和歡逢

宴鎬之時濫吹徒歌輒効鈞天之末塵瀆旒宸伏深戰懼
無任祇惕之至

請停徵浙西雜罰錢疏

滉懲人吏皆是罰錢格式正賊流徒合免況多雜罰身已
當辜縱有欠繫僅存家資估賣盪盡以滉至苛至切比年
猶徵不得臣自發上都煩言載路及到所部有所傳聞臣
謬寄方隅特蒙天造奉辭之日親承德音今臣開闢田疇
安輯黎庶豈敢流毒無告勤人自容特請停徵以綏下土

對庶子牲祭失禮判

得庶子爲大夫以上牲祭其家人告其失禮辭
云宗子爲士不可以貴就賤

霜露孝思朔月殷祭申其爵祿格以祖考苟或違經是同
匹嫡相彼庶子命爲大夫體異承祧位踰齒族固令奉其
常祀從以大宗獻上牲於歲時稱介子於工祝使僂然之
歎不絕於聲如在之義復存於目乃黜於祀典越我顛毛
恃肥腴之牲牲或將或肆繫豐盛之黍稷于豆于登假祖
禰之恩二重實疑於夫子竊烝嘗之薦三廟奚取於私家
仍聞就賤之辭豈聽如流之責實誣之祭人何以觀

對士祭判

爲士殺犬豕或人告君子遠庖廚凡有血氣之類不身踐訴云有故準禮不坐

禮以制人命以防慾是彰品秩無取僭差苟豐約之不踰於德義而斯美乙周行已寘忝曰王臣班列尚微蓋爲元士曾靖恭其位不虧莊敬之文當官而行旣不越於時式執禮以動亦何恤於人言屬霜露旣零春秋匪懈爰修饗祀載展牲牷近彼庖廚雖則踐於血氣潔茲犬豕頗亦薦於夫疑膏旣稱有故而殺難議不經之科或人詞游宜以

麗法

對縣令有客判

縣令有客吏賀皆往或遺賀錢萬人告其受贓
辭云其實不持一錢

賓實有禮將存執贄之儀相在於堂爰司主進之務惟彼
縣尹是亦爲政詩愷悌以字人需飲食而肅客宓琴多暇
偃室常閑將有四方之賓用致萬錢之賀彼吏人而迭進
伊或者以員來財非撫實詞則誇誕稽諸漢史且曰大言
詳乃呂刑寧聞黷貨哂無狀而即可驗受贓以謂何

盧正已

正已字子寬初名元裕代宗賜今名元宗幸蜀命典通義
唐安二郡累遷成都尹劍南節度採訪使太子賓客大厯
五年卒贈太子少保

請定杖法奏

準式制敕與一頓杖者決四十重杖一頓者決六十無文
至死式內自有殺却處盡等文卽明重杖只合加數京城
先因處分決殺者多一死不可復生望準式文處分或決
痛杖一頓者式文旣不載亦請準杖六十例不至死

史元璨

元璨

新唐書
無璨字

上元三年官太常博士

禘祫議

上元三年十月

按禮緯三年一祫五年一禘公羊傳云五年而再殷祭兩
文雖互其義略同禮記正義引鄭元禘祫志云春秋僖公
三十三年十二月薨文公二年八月丁卯大事於太廟公
羊傳云大事者何大祫也是三年喪畢新君二年當祫明
年當禘於羣廟僖公宣公八年皆有禘則後禘去前禘五
年以此定之則新君二年祫三年禘自爾已後五年而載

殷祭則六年當禘八年當禘又昭公十年齊歸薨至十三年喪畢當禘爲平邱之會冬公如晉至十四年禘十五年禘傳云有事於武宮是也至十八年禘二十年禘二十三年禘二十五年禘昭公二十五年有事於襄公是也如上所云則禘已後隔三年禘禘已後隔二年禘此則有合禮經不違傳義謹議

李勉

勉字元卿鄭惠王元懿曾孫從肅宗於靈武擢監察御史累遷京兆尹兼御史大夫拜嶺南節度使大厯中進工部

尚書封沂國公德宗立加檢校吏部尚書同中書門下平章事建中元年檢校左僕射充汴宋滑亳河陽等道都統四年以司徒平章事徵罷爲太子太師卒贈太傅諡貞簡

廚院新池記

謹按是篇一作李華

遇知己而用者匪唯於人物亦有之初廚院因前池餘派浸潤坳堂數步及雷纔供廚飪滌器而已邑大夫南陽范惜跡累人羣心在遐曠每休沐之暇訪道山林見其有天造池沼之形而遂爲溝瀆乃命黃冠等頤指廣袤鑿周宇下駢石以涯之蓄流以深之清瀾忽平秋陰滿院執爨無

欲清之僕挈瓶無汲深之勞不造機事而功贍於物范公
實所謂新池知己矣靜勝則道純境幽則神完予與吳天
師采真洞府朝夕窺臨瑩澈心膽滑昏潛遁事苟愜於心
則與登姑蘇望五湖而齊矣故因碑籀餘地刻而誌之猶
詩人有泌泉之作大厯五年歲號上章閹茂八月一日記

滑州新驛記

滑臺舊驛天寶丙申歲逆臣盜國師競而焚滑臺四衢通
於四海夷貊奉聘諸侯覲王有疊騎擊轂填郭翳術之日
也或寒洳凝血或炎赫鑠肌疲心躁憤駢立無寄剛塞者

多氣奮盱衡溫愿者猶神忿吐息雖遠馨醪膳腐積菽橐
小吏夏執輕箠冬備重裘獻用無所曷補餒殆常惕惕祇
懼終湑湑議繁亦有吟憤作誣口吻震發者幕客請余構
驛傳以備政縣吏請余廣驛傳以息責遂命試光祿卿兼
同州別駕裴萬以恪以幹俾主剗剔圻壤之工授其意曰
無尚雕木之異無榮飾土之奇揆時勿奪詳費就簡惟疎
楹棟將違暑也廣庭廡將達風也取寧體之用去娛目之
奢彤彩爲文刻剗像物有益勞費豈利蔭庥況玩巧蕩神
誇麗踰度乎及息役休工閱成度費則萬祇懷不墮余誠

素不違乘輅之賓無或嗤余不效徐湛之風亭月觀之盛也
大厯甲寅歲八月二日記

李陽冰

陽冰字少溫趙郡人寶應元年官當塗令終將作少監

對元日懸象稅千畝竹判

甲懸政象之法闕下金吾不許曰職在佐天子
以平邦國浹日而斂之 又乙家渭濱有竹千
畝京兆府什一稅之辭云非九穀

司馬之職懸政一時封君之富比竹千畝高標魏闕事昭

之作故其言多似天仙之辭所爲著述言多諷興自三代
以來風騷之後馳驅屈宋鞭撻揚馬千載獨步惟公一人
故王公趨風列岳結軌羣賢翕習如鳥歸鳳盧黃門云陳
拾遺橫制頽波天下質文翕然一變至今朝詩體尚有梁
陳宮掖之風至公大變掃地併盡今古文集過而不行唯
公文章橫被六合可謂力敵造化歟天寶中皇祖下詔徵
就金馬降輦步迎如見綺皓以七寶牀賜食御手調羹以
飯之謂曰卿是布衣名爲朕知非素畜道義何以及此置
於金鑾殿出入翰林中問以國政潛草詔誥人無知者醜

正同列害能成謗格言不入帝用疎之公乃浪跡縱酒以
自昏穢詠歌之際屢稱東山又與賀知章崔宗之等自爲
八仙之遊謂公謫仙人朝列賦謫仙之謠凡數百首多言
公之不得意天子知其不可留乃賜金歸之遂就從祖陳
留採訪大使彥允請北海高天師授道籙於齊州紫極宮
將東歸蓬萊仍羽人駕丹邱耳陽冰試絃歌於當塗心非
所好公遐不棄我乘扁舟而相顧臨當掛冠公又疾亟草
藁萬卷手集未修枕上授簡裨余爲序論關雎之義始愧
卜商明春秋之辭終慙杜預自中原有事公避地八年當

時著述十喪其九今所存者皆得之它人焉時寶應元年十一月乙酉也

縉雲縣城隍神記

城隍神祀典無之吳越有之風俗水旱疾疫必禱焉有唐乾元二年秋七月不雨八月旣望縉雲縣令李陽冰躬祈於神與神約曰五日不雨將焚其廟及期大雨合境告足具官與耆耄羣吏乃自西谷遷廟於山巔以答神休

惡溪銘

天作巨壑險于東南岌邱巘呀蒼山黑潭殷雲填填怒虎

魁魁一道白日四時青嵐鳥不敢飛猿不得下舟人聳棹
行子束馬知雄守雌爲天下蹊烜赫如此人將畏之水德
至柔狎侮而死畏而不死寧取於彼

庶子泉銘

賢哉官相牧此滁上政成務簡心閒跡放探幽近郭選奇
疊嶂疏石導泉飛流瀉漲蓄泄潭洞嶽空演漾澄注縣瀑
千名萬狀能諧吏隱脗合意匠退食自公爾和予唱遺檢
捨局體逸神王勒銘層崖來者斯尚

忘歸臺銘

疊嶂迴抱中心翠微隔山見川溝塍如棊環溪石林春迷
四時曲成吏隱可以忘歸

龔邱縣令庾公德政碑頌

并序

荀藐古之良宰也榆次碣之庾公今之賢百里也龔邱頌

之姑無其能孰

字關三

議者謂庾公之政尤矣公初告羣吏

曰昔孝宣憂元元以爲經國致理先乎令長迺擇郎官御
史出宰縣邑我自任城尉驟居五百石非才何以當之誓
務整蘇疲人祇若明命迺崇禮讓省刑罰紆力役闢土田
宣慈務寬訓儉示德潤作時雨和爲春風於是齊魯丕變

井間咸復三載考績一方歸最都督兼侍御史清河張公
曰昌牧伯之賢也訓俗馭官勸直沮枉述職之地類能稱
之曰方諸爽氣日暮更清比之松筠歲寒轉茂題以上下
之目出乎羣萃之表百城千里異聲同歡曰以伯達之良
牧賞次孫之茂宰宜矣公名賁字文明其先潁川人成周
之時世爲掌庾因以命族公其胄焉公之考曰欽嗣爲充
州別駕王父曰元汪爲尋陽令曾王父曰師則爲蜀王文
學楷模繼代龜麟接武大厯中邑老彭湣等三十五人以
公岐柔之大咸願刻石褒美申於元戎元戎允答縣人以

陽冰與公周旋備詳德行俾之作頌多愧能文辭曰
於穆庾公宰字之良化洽百里風摛一方邑老上請願言
頌德元戎嘉之金石迺刻

欽定全唐文卷四百三十八

徐承嗣

承嗣廣德二年官司天臺夏正官

奏歲星太白同躔不犯狀

木處仁君恩於養也金全義德體其政也今月四日臣伺
候屬輕濛隱映光迹暫明位指東西不盈南北勢凌密近
切慮相干陛下展禮齋宮陰騰又蔽星擬土錯不露其瑕
及廟宿精誠天容若鏡今太白避歲審之二尺有餘昔熒
惑守心之明三退無謬加以禋祀五帝敬告百神是憑法

象呈休蒼生致福偃兵歸馬不遠來期孝理行歌起於茲
景事殊古典應美前書望付史館兼示中外

陳簡甫

簡甫右拾遺子昂孫官御史

宣州開元以來良吏記

君子所貴乎德積於中而化行於外大可以篆鍾鼎次可
以備謳歌所謂古人遺愛沒而不朽者也宣州秦故郡之
地阻以重山緣以大江封方數百里而銅陵鐵冶繁阜乎
其中故其俗佻而侈其人勁而悍屬鞭撻者習以爲恒

易於寇讎昔號難治武德中天下既定唯茲後附自是朝廷艱厥官非勲賢崇茂者文明中正者清貞孤拔者法令峻整者無以刻符爲邑焉先天之前人物紛綸矣自開元距今惠化浹物清修邁倫故事傳於府中淑問存諸故老得之數公焉有若裴耀卿者蘊公輔之器受分憂之任以爲立政在於樹本樹本在於設教設教在於率身乃潔其源舉其端削煩苛布寬惠簡易得而庶務修愷悌行而羣心化赭衣墜面者知禁鄉校黨序者胥勸自是宣人始服教矣開元癸酉歲國家以天下久平四海繁富慮吏之不

率人之不廉乃詔分十道署廉察以督之此州統江南之西包潭衡十有六州而班公景倩始受命焉公清廉以飾躬苦節以從政以爲法者國之柄天下之評寬則阿阿則公室之權削矣急則刻刻則下民之怨生矣江右荒服政紊俗訛濟之以猛弛張在我乃布甲令舉直繩恤人之疾苦除吏之貪暴踰年坐賄削免者百有餘輩澄清之政於是乎得矣有若竹公承構特高孤貞行懿直方秉法以馭下去邪以爲治鰥惸於是乎康豪奸於是乎息矣代班之政不易其舊閱歲而屬城放黜者幾乎前焉初上以遐方

罔迪邦禁思文法之臣而二公繼蒞於茲政斯清人斯寧
俾吾楚之俗不憊於度者二公是賴豈比夫延年有掃墓
之稱郅都垂蒼鷹之號彼皆刻深而我不濫可同年而語
哉有若裴公敦復者繼班竹之餘承法理之極變而通之
使人不倦推而廣之使人知化振綱而羣目張舉大而細
故削破觚爲圓齊變爲魯澆俗由是觀於義矣有若涇大
夫李偁者行溫而恭政清而簡不矯激以干譽不嚴厲以
臨下反躬而令行存誠而化達天寶初自太平長遷於涇
涇與太平壤距而俗二游爲二邑僅盈十稔蓋久於其道

而惠和之德漸於人之氣血矣故溢於去思夥於歌謠後
卒此州長史以桐鄉之愛歸竈於涇而家因寓焉廣德初
羣盜蜂軼連陷縣邑人士罹難者比肩而李公之間獨完
由羣盜聚而保之且曰無忘公德也於戲召公之化勿翦
其棠柳季之仁不薪其墓豈若凶寇懷惠束手侵掠又難
於古之人矣招討使給事中袁公異而上聞詔贈宣州刺
史旌善也有若司功掾張邈者清而廉謹而信非自公無
以舉非祿稍無以入私謁杜於居官饋贈絕於故吏肅肅
然有寒松貞玉之操焉由是累辟使車令奉丹墀青冥之

階其在茲也昔在漢世黃霸課最於潁川魯恭化流於中
牟皆異時齊芳高映簡牒曷若一州之政年末三紀而循
良者六人歟大厯初兼御史中丞陳公總方鎮臨此州緬
想前哲徵諸輿誦以爲旌賢者所以崇德作頌者所以垂
勸以數君之美需乎在人而不播絃歌傳於竹素逶迤頽
靡與尋常者共貫則何以激清風教發揮盛業歟以小子
學乎春秋世於文翰爰命操簡用紀餘烈其里氏族望則
世家存焉故不書大厯己酉歲三月二十五日記

盧邁

邁字子元范陽人明經第補太子正字累遷尚書右丞貞元九年以本官同中書門下平章事遷中書侍郎以疾乞休除太子賓客十四年卒年六十贈太子太傅

議元亘不受誓誠狀

臣按禮記大夫士將祭於公既視濯而父母死猶奉祭又按唐禮散齋有大功之喪致齋有周親喪齋中疾病卽還家不奉祭事皆無忌日不受誓誠之文雖假寧令忌日給假一日春秋之義不以家事辭王事今亘以假寧常式而違攝祭新命酌其輕重誓誠則祀事之嚴校其禮式忌日

乃尋常之制詳求典據事緣薦獻不宜以忌日爲辭

甯齡先

齡先廣德二年鎮南副都護

合浦珠還狀

合浦縣海內珠池自天寶元年以來官吏無政珠逃不見
二十年間闕於進奉今年二月十五日珠還舊浦臣按南
越志云國步清合浦珠生此實國家寶瑞其地元敕封禁
臣請採進

趙宗儒

宗儒字秉文鄧州穰人第進士累授翰林學士建中時厯
屯田司門司勳員外郎貞元中進考功郎中遷給事中以
本官同中書門下平章事罷爲太子右庶子遷吏部侍郎
元和朝拜吏部尚書穆宗立檢校右僕射守太常卿拜太
子少師寶厯初遷太子太保太和六年以司空致仕卒年
八十七贈司徒

請權罷應制奏

準今月十五日敕比者先朝徵集應制人等已及時限恐
皆來自遠方難於久住酌宜審事遂委有司定日就試如

聞所集之人多已分散須知審的然後裁定宜令所司商量聞奏者伏以制科所設本在親臨南省試人亦非舊典今覃恩旣畢庶政惟新況山陵日近公務繁迫待問之士就試非多臣等商量恐須權罷

順宗至德大聖大安孝皇帝哀冊文

維元和元年歲次丙戌正月一日丙寅朔十九日甲申大行太上皇崩於興慶宮之咸寧殿旋殯於大內太極殿之西階粵以其年七月壬申朔十一日壬午將遷座於豐陵禮也龍輶將進魚帷已拂庭引廡儀衢陳備物哀子嗣皇

金史卷之五 卷四十三
帝諱孝思罔極昭感人神痛天儀之永閔攀德音而靡聞
盡哀誠於祖奠徹永慕於顙旻欽惟宸範宜光典冊乃詔
魯臣纘揚聖績其詞曰

太陽麗天朗曜清懸元后統位至化光被洪惟我唐紹興
哲王德宣風土法化乾綱爲政本仁寶系攸長積習和氣
變爲禎祥矩範相纘巍巍煌煌十葉丕慶膺茲駿命稟乎
聰明生知孝敬秉文成訓惟睿作聖祚厯攸歸天保斯定
厥初錫壤敝彼維城及升上嗣萬邦以貞道邁儲訓業茂
繼明總於至妙御乎至精天休廣運播茲清問緯武經文

金鏗玉振不絕馳道有過茲慎莫見于微曷窺其朕六律
諧度四時齊信庠筵齒胄望苑招賢學閭與海詞峰峻天
深工八體尤洞三元秉志樂善銳思計研敬老尊道優游
文囿至蹟必精微言咸究不習而知莫非天授建中季祀
邦都盜起皇輿出狩幸於郊壘逆侵晝霾衝發如燬扈蹕
之辰從曰撫軍每躬誓衆能感師人竟掃兇孽於昭大勲
惟謀靜難惟孝安親出震御圖如運璿樞慮宏拯物情窮
泣辜深仁降感至澤旁敷洋溢汪濊格于天區寬刑恤隱
省賦蠲逋斥絕奇貢歸還戎俘出中宮之音妓愍戎塞之

勤夫有命焚鳩永光典謨元風大扇庶類忻愉疾瘵皆愈
蕙蕤發枯理臻至道我得元珠垂裳負宸懷茲寅畏美利
天下雲行雨施人自遷善時稱不諱覆育之恩無不茂遂
含靈逢幸澡濯聖政泰元降祉媪神薦慶猛獸皆仁羆毘
遂性憬夷慕化向風翹聽八表無塵一時之盛方播金石
流于舞詠爰降沖志稱于倦勤褰裳釋位思保怡神惟聖
禪聖光于君臨傳萬葉之丕構浹四海之歡心付託之際
人祇感深棄代昌期興運本枝遇乾坤之交泰見堯舜之
同時尊名崇於聖壽至道體於希夷嗣皇帝

闕三字

德永裔

垂則資敬問安乾乾翼翼一人事親化行邦國沖舉何早
栖靈物表聖慕極於充窮人悲集於荼蓼嗚呼哀哉葆翽
儼陳招搖初轉背紫禁而歸壽陵出青門而臨下苑金鼓
聲兮二儀震煙雲慘而百里遠寶馬局步於逶遲縞士揚
音於楚挽嗚呼哀哉瞻彼重峰中起靈宮衆山朝衛鬱鬱
崇崇積凝巖之崇靄聚浩野之悲風睇長天而怨不極指
流水而恨無窮嗚呼哀哉萬方臣子心崩以摧會七月之
畢至望九疑而增哀攀龍髯而何及泣鸞輅之空迴嗚呼
哀哉崇茲嚴寢邈矣終天獸方護闕鳥亦耘田閉虛儀於

宸宇響夜漏於青川嗚呼哀哉五雲之上六龍以飛難攀
真駕空觀游衣寥廓一往曷其有歸惟英蕃與睿範傳萬
代之洪徽嗚呼哀哉

竇從直

從直元和中官殿中侍御史內供奉

進善旌賦

以設之通衢俾
人進善爲韻

邈矣帝德至哉聖謨廢置殊時古今合符子子之狀可觀
將從五達孜孜之道斯表克協三無是以聳彼羣彥致之
康衢願揚美以歸厚思獻忠而效孚故得繼以此信言由

是進明揚旣達且自殊於表閭謬必陳豈可同夫先俊
觀其悠揚廣衝旖旎從風諒賢愚以咸覲固朝野而必同
式委垂而下俯埃壘乍直指而上映晴空過之而凜然生
敬仰止而卓爾在中苟厥志之有立當其誠以遂通俾其
不進不止豈徒自西自東已哉俟爾貞烈自非虛設旣異
詩人之干旄非同叔孫之繇菽匪善奚取惟賢是謁彼謗
木焉得而比矣諫鼓胡可而傳之苟匡救之惟徵我無爾
詐而旌別之有制爾無我欺則賢旣樂只人將率俾不獨
翻曉日以搖搖獵輕風而靡靡至仁斯被至化爲淳何必

改舊然後爲新矯前王之令德酌古典之攸遵雖謨訓以克備尚芻蕘之是詢萬國欽風巖廊盡英髦之士百蠻向化版築無屠釣之人故知至德在於求賢救世資乎擇善則設旌之道也爲皇王之盛典

唐故河南府司錄盧公夫人崔氏墓誌銘

元和甲午歲有夫人崔氏粵華宗令人德門賢婦以首秋再旬旬外五日終于東都正俗里之私第享年六十九嗚呼母儀厚德婦道宏訓令問如在誰其嗣之夫人諱績號尊德性博陵安平人也東漢魏晉延耀不息迨至本朝宜

昌而熾曾大父通許州司馬王父知遜祕書丞贈國子祭
酒父倫代宗朝以前御史中丞使吐蕃拜尚書左丞歿謚
敬公伯曰譚左司郎中伯曰榮右補闕叔曰殷衡州刺史
而皆以禮自持用榮爲誠善慶所及夫人益光夫人卽敬
公之季女也年十有一歸于范陽盧公惟公人倫碩德冠
冕良材往踐王畿滯登臺閣器業尤重紀綱洛川貞元已
卯先夫人而屈於命夫人晝哭捐軀未忘誓志無違撫育
不易慈仁剋已成家樹立餘業過此則修學大悲一切解
脫夫人元昆衍德宗朝以御史大夫觀察宣歙池三州歿

諡懿公夫人與公孝慈以類告終歲月十稔而同同氣之言於斯可驗矣夫人有男一人女二人女則組紉稟訓婉婉承華結褵從夫榮耀他族男曰從雅頃歲辟召制有成命參佐戎律換萬戶尉終養不虧十年向晦丁艱筮宅竊疚其懷初司錄府君先卜梓柏谷關因而祔焉至是問從祔于著龜不克問改祔于著龜襲吉君子曰傳無不之今則何遠乃歲十月六日奉夫人輶襚啟府君東北九里合防以虞陵谷順也嗣子謂從直忝懿公顧盼又備末姻尚戴恩光早詳勲閎託之琬玉貽厥彤人銘曰

夫人之生榮耀勲華鳴環適人慶彼夫家姻族惠懷靡不
稱嗟溫玉貞松保厥終始母儀婦道遺範已矣雪涕鮮原
反覆孝子

孫廣

廣永泰中官大理寺評事

嘯旨序

夫氣激於喉中而濁謂之言激於舌端而清謂之嘯言之
濁可以通人事達情性嘯之清可以滅鬼神致不死蓋出
其言善千里應之出其嘯善萬靈受職斯古之學道者哉

故太上老君授南極真人南極真人授廣成子廣成子授
風后風后授務光務光授舜演之爲琴以授禹自後或廢
或續晉太行仙人孫公能以嘯得道而無所授阮嗣宗所
得少分其後不復聞矣

馬燧

燧字洵美汝州郟城人大厯中爲河陽三城使汴將李靈
曜反燧擊破之遷河東節度使又以破田悅功加同中書
門下平章事魏州大都督府長史兼魏博貝四州節度觀
察招討使興元元年檢校司徒封北平郡王討平李懷光

遷光祿大夫兼侍中與吐蕃盟平涼爲蕃軍所劫奪兵柄
守司徒貞元五年圖形凌烟閣十一年薨年七十贈太尉
諡莊武

諭晉隰慈州檄

興元元年八月某日河東保寧奉誠軍行營副元帥北平
郡王燧檄告晉州要君廷珍隰州毛君朝敷慈州鄭君杭
及將士吏等蓋聞率土莫非臣盡念在三之訓明王伐不
敬有嚴討貳之刑義士不求生以害仁智者能轉禍而爲
福其畢棄咎咸與惟新國家幾葉繼明億年凝命天保以

上采薇以下內撫外從濮鉛以北祝栗以南德洋風普神
旌遞列寔寐咸誅堯治時雍猶有青邱之梗舜仁天憐未
誅丹浦之凶李懷光奮渤海之俘授蒲津之節始謂狙詐
之足使不虞鷹犬之易颺犇命醴泉粗展勤王之績請朝
行闕輒哀犯上之謀猶念前勲屢縻好爵張萌芽於霜雹
悖木水之本原升鸞之謀肆行巢父之使弗返奮二軍而
殲良將剽三老而翦近畿豕心莫俊鴉音不革已復漢京
之日月載揚周旅之雷霆幕府承命齊壇建牙列鎮正正
之旗堂堂之陳莫我敢承赫赫厥聲濯濯厥靈有征無戰

渾侍中率同陝之士韓僕射統邠寧之師唐節度虎視鄜
坊駱將軍熊踦鎮國風雲助氣草木爲兵詔參伐以清氛
命招旌而繕怒不俟前茅之過坐成獨柳之誅惟爾三州
之士夫夙被累朝之德澤嶠從處仲適受逆汙遵事隗囂
豈爲賊守鼎魚假息穴兔貼危犯大義者衆必攜作不善
者神弗赦歷數古今所記未聞叛逆獲全惟岳阻兵汔膏
齊斧朱泚竊號亦梟藁街矧茲狄孥敢干天罰犬馬猶有
主覆載不容鱣鯢取以封脅從罔治聖上禹湯罪已文武
行仁凡鳴狐假王之妖首鼠觀釁之將莫不匿瑕宥戾磔

金史卷之三
三
垢滌污雖三子猶存蓬艾之間豈太陽不回葵藿之照尚
式王命共惟帝臣勿相依於輔車以俱焚於玉石倘能洗
心效順解甲來歸績獻關東疏封帶礪融金河右紀烈旂
常若迷復怙終猶豫不斷蹈干顯戮諡爲至愚豈惟敷虐
多方亦將遺臭千載請擇二者永肩一心耆定爾功復見
弓橐而戈戢式化厥訓庶幾世變以風移檄到如章書不
盡意

李訥

訥字敦止第進士累遷中書舍人出爲浙東觀察使貶朗

州刺史召爲河南尹凡三爲華州刺史歷兵部尚書終太子太保

授盧宏正韋讓等徐滑節度使制

門下彭城故壤南據長淮滑臺重鎮西疆巖邑建牙謀帥於是攸難合得全才式光並命義成軍節度使盧宏正識略圓明襟靈倜儻行有枝葉文耀菁華扣洪鐘而自韻宮商挺鉉刃而前無根節檢校左散騎常侍駙馬都尉韋讓機謀通敏誠性端和族茂簪纓望兼賢戚鄙羶金而必專詩禮挺玉質而不雜風塵並稟粹元精宜符景運或發聲

文囿攘臂吏途休功流美於劇權理行推高於良翰經武著安人之略事君堅許國之心或早踐通班騰芳懿行職守交修于列寺出納無愧於有司操刀呈剗割之能馭點有神明之稱徊翔中外迭振徽聲簡自予心膺茲闡寄總齊邦事節制王師朕以徐方一軍義勇素著帥臣無狀戎府不寧爾其便道持行著安闔境推誠宜先乎必信開懷以勗其後圖使軍城保晏開之安邑居絕夜吠之警然後昭宣號令折衷恩威務壯其猷以清厥慙將俾望風而理豈期朞月有成屬在新規注意彌切於戲訓戎撫俗節用

厚生政苟有經人自知禁爲邦之道豈易於斯並進秩於六官仍亞榮於三事往踐乃職爾惟戒哉可檢校戶部尚書工部尚書各兼節度使

授薛元賞昭義軍節度使制

門下上黨古今之重地也東山東之襟要控河內之封壤擇我良帥屬在全才銀青光祿大夫袁王傳薛元賞性含宏厚智識圓方秉忠孝以立身參文武而爲用早備器使雅聞公才誠明與人寬大懷物再尹京邑威名甚高寇攘之徒相視束手旋以長轂臨于彭城嚴而不苛通則有守

移旆巨野益恢壯猷將材吏師首出藩服洎總牢盆之任
頗多贍國之能薦分竹符理行居最常慕子文之道爰從
賈誼之微恬然自居物論歸重是用擢於傳導命以土田
解長裾於戚藩樹高牙於戎閫爾宜貞厥師律劭其農功
訓齊撫綏無墮前志右職分五兵之重南臺膺副相之榮
疊處寵光俟乃成效

授陳君從鄜州節度使塞門行營使制

門下洛水交波鄜城舊時地當寇壘界接王畿外爲襟帶
之邦中有賦輿之實屬者黠羌未戢燔燧猶虞置將或乖

征師向老思得頗牧付之邊疆擢吾材臣式昭奇策邠州
刺史陳君從學啟玉鈴志昭甲令機符天與信愿生知浸
染於勲伐之門奮發爲英謀之士特稟雄氣魁然壯猷窮
黃石之三編笑長沙之五餌久服戎旅益通武經遂升外
臺俾守栢邑歌繻袴而苛慝不作提卒乘而障塞不驚而
又累陳表章願展材効雖遵條共理仁風見重於朱幡而
授脰分麾將星宜明於紫塞旣申引拔寧繫班資爰思鼓
輦乃錫鈇鉞秉列部察廉之務佐兵車招討之名首戴附
蟬之冠位長集烏之府總制師旅振揚軍聲往圖休庸勉

答殊寵於戲玉關迢遞定遠收功先零猖狂營平善計建
此勲者彼何人哉宜堅盡敵之心以固請纓之志無令直
筆有愧前修

紀崔侍御遺事

李尚書夜登越城樓聞歌曰雁門山上雁初飛其聲激切
召至曰去籍之妓盛小叢也汝歌何善乎曰小叢是黎園
供奉南不嫌女甥也所唱之音乃不嫌之授也今老且廢
矣時察院崔侍御自府幕而拜李公連夕餞崔君於鏡湖
之光候亭屢命小叢歌餞在座各爲賦一絕句贈送之亞

相爲之首唱崔下句云獨向柏臺爲老吏皆曰侍御鳳閣
中書卽其程也何以老於柏臺衆請改之崔曰某但止於
此任寧望九遷乎是年秋崔君鞠獄於譙中而終

東林寺舍利塔銘

并序

設位貞觀莫大於乾坤懸象著明孰踰于日月而世間智
識強推廣大之名繫表機深莫究窈冥之類是以法身利
見無爲之寂風偃化跡分軀不盡之靈雲李疑竺乾清淨
之教始自他方菩薩慈悲之法聿行中土猶是元關幽鍵
委積龍宮紺髮青眸光暉鴈塔驅八紘于忍域置萬物於

仁寰非般若之蘊乎孰能臻于此也東林寺上坊舍利塔
者有宋佛馱跋佗羅禪師之所立也爾其一經地理接化
鳥之南圖一緯天文承斗牛之北次崗巒出沒下積風雲
洲島縈迴旁羅井邑割東林之淨壤揆西域之神模瀑水
周軒鑪峯對雷升楹翠拱標迴日月之宮寶綴珠櫛影出
雲霓之路禪師先持舍利五粒隨身供養於是貯以石函
藏之珍塔屬陳隋代謝陵谷貿遷雖入神之作而有扶助
而必壞之相終從雕朽爰有沙門上座曇傑等柴桑盛緒
蘭茝香名早悟三明深知二諦感禪師無生之業遠酌規

模覩禪師莫泯之蹤願言興葺昔景龍之歲御史清河房
光庭歎其荒毀盡留征橐蘇州司馬王弼紹其成績更脫
僑裝鶯鶯肇于前鵷鴻嗣其後軒疏若舊藻績惟新如鳥
之薨入烟霄而重翥盤龍之桷得風雨而還飛復增舍利
一十有四更以金銀鐵爲棺槨同寶聚之爭分似珠囊之
交映遊區果者覺地位之超昇覩光華者喜身心之快樂
非聖圖之冥感何公緒之速成耶跋佗羅禪師者迦維羅
衛國人漢言賢甘露梵王之苗裔少孤爲外氏所養從祖
鳩摩剎聞其聰異乃迎還度之年十七與同學業習衆

皆一月賢一日覽焉其師曰賢一夫敵三十人也及受其
戒國以禪律宗之禪師自西泊東數見神變允謂知變化
之道者其知神之所爲乎至長安常與鳩摩羅什剖析幽
旨什每屈焉秦主姚興大弛末法禪師退藏於密猶嬰謗
議乃拂衣東顧杖錫南騫益修無住之業卽事遊方之化
因指廬岳而慧遠法師在焉遠公以禪師名稱特高義諦
攸出慶殊鄰之會面得營道之同心乃招入香庭中分蘭
若規于塔後芟草而禪亦居不求安也宋武帝深加禮敬
固請還都止道場寺先是沙門於于闐得華嚴前分三萬

六千偈未有宣譯至是屈禪師會通華戎錯綜文義故道
場寺至今有華嚴堂焉皇帝自躍至飛笞中興之命先郊
後岳修太平之舉步自開元今龍集攝提格七月丁丑朔
二十八日甲辰凡一紀而有二載矣若夫鼓天下之動者
存乎文辭傳不朽之跡者存乎事業此寺營建六代于茲
求其刊勒兩碑而已遠法師高談色相欲求寂滅之源謝
康樂初入妙微不書立言之意訥才非半古命不偶時頃
自庫部郎中出爲此州刺史剖符淹歲奉計臨岐傑師以
琬玉圖文俯詢巴曲下走以蘭荃有興因奏楚辭駐楫抽

毫乃爲銘曰

大道旣隱兮世運陵遲法雄利見兮光啟導師曲阜以夜
明爲初日休屠以天際爲末時七覺來晚三明樂推詮其
不住之法唱以無緣之慈爰有上人挺生迦衛信美東土
我違西裔遇澄什于關中披林遠于江澨密句不可以無
說奉宣譯于瑤緘神物不可以終否寶光暉於銑函建神
模于峇峇聳層臺于嶰嶰物壯期於必朽色空在于無滅
其增舊也見白黑之彌綸其取新也有丹青之秀發惟精
惟微兮等般若而無竭

馮伉

伉本魏州元城人徙京兆大厯初登五經秀才科授祕書郎建中四年又登博學三史科三遷尚書膳部員外郎厯給事中順宗立進兵部侍郎拜左散騎常侍元和四年卒年六十六贈禮部尚書

科處應解補學生奏

應解補學生等國家崇儒本於勸學旣居庠序宜在交修其有藝業不勤遊處非類樗蒲六博酗酒喧爭凌慢有司不修法度有一於此並請解退又有文章帖義不及格限

頻經五年不堪申送者亦請解退其禮部所補學生到日亦請準格帖試然後給厨後每月一度試經年等第不進者停厨庶以止姦示其激勸又準格九年不及第者卽出監訪聞比來多改名却入起今已後如有此類請送法司準式科處

路季登

季登陽平寇氏人大歷六年進士累辟使府升朝爲尚書郎終左諫議大夫

皇帝冬狩一箭射雙兔賦

以題上六字爲韻

大矣哉我唐之盛兮七葉重光襲文明以爲德表武烈而
稱皇于是行冬令稽舊章當清風之戒節建元律之司方
時因展狩禮備肅將信不差于王道豈取樂于禽荒者哉
若乃整鉤陳嚴羽衛星旄燭野雲旗拂曙周長楊而爲陸
屬甘泉以爲綴騁六龍而電發顧雙兔而飈逝性覓狡而
不恭足輕迅而靡制爰從聖射乃觀神藝鑿鑿卻轉引拓
月而隨圓金鏃斜飛疊霜毫而俱斃旣絕系而達臆亦洞
胷而裂眚岐陽之美不獨稱于周王上林之雄未可論于
漢帝觀夫歲聿暮時旣冬采吉日詠車攻或備鮮于乾豆

金史卷之二十一
或薦芬于祖宗匪合圍而縱獲諒閱武而觀農且箭協陽
爰兔唯陰獸柔而不犯信爾類之可全強以多猜信我網
之不漏伊省括而一發紛應絃而雙仆所以彰聖武于無
窮表靈誅于薄狩至如馳騖裒跨深密追捷蹤騰勁質飄
勇氣于蒼昊抗稜威于白日激流電而指顧躡奔星而迅
疾疊穿兮彼兔則雙舍拔兮我矢惟一足使百蠻膽喪萬
人股慄遐哉邈乎不可談悉彼更羸之絕藝蒲且之妙術
曾何足以擬議焉于是殺氣肅英風扇信合美于三驅實
挺奇于一箭然後迴雕輦御金殿或昇台階或歸鼎膳乃

知我皇之盛德眇萬古之罕所聞見者也

韋夏卿

夏卿字雲客京兆萬年人大厯中賢良方正高等累遷吏部侍郎轉京兆尹太子賓客檢校工部尚書東都畱守辭疾改太子少保卒年六十四贈尚書左僕射諡曰獻

東山記

自江之南號爲水鄉日月掩藹陂湖蕩漾游有魚鼈翔有鳬鴈涉之或風波之懼望之多煙雲之思自朱方達于震澤三百里而遙惟毘陵地高林麓相望邱陵塹阜隱嶙蟬

聯雖有崖巘之形終無峻極之狀封域之內罕名山焉有
唐良二千石獨孤公之莅是邦也人安俗阜三稔於茲文
爲宗師政號清靜有仁智山水之樂有風流遐曠之懷如
獨鶴唳天孤雲出岫想見其人也公嘗言謝公東山亦非
名岳苟林巒興遠邱壑意深則一拳之多數仞爲廣矣由
是於近郊傳舍之東得崇邱浚壑之地密林修竹森蔚其
間白雲丹霞照耀其上使登臨者能賞遊覽者忘歸我是
以東山定號始於中峯之頂建茅茨焉出雲木之高標視
湖山如屏障城市非遠幽聞鳥聲軒車每來靜見水色復

有南池西館宛如方丈瀛洲秋發芰荷春生蘋藻晨光烟
曜夕月澄虛信可以曠高士之襟懷發詩人之詠歌也自
公之往清風寂寥野獸恒遊山禽咸萃不轉之石斯固勿
伐之木惟喬而繼守數公實皆朝彥雖下車必理或周月
而遷志在葺修時則未暇貞元八年余出守是邦迄今四
載政成訟簡民用小康永懷前賢屢陟茲阜芟薈蘙而松
桂出夷坎窞而溪谷通不改池臺惟雜風月東山之賞實
中興哉於是加置四亭合爲五所瞰野望山者位正背林
面水者勢高遷竚區陳賓寮有位琴碁閒作簫管時聞從

我之遊者咸遇其勝也嘗以水通舟楫陸阻車徒端徑術
於通津翦樛蕪於迴野凡五六里抵于亭之南植山松以
作門樹官柳以界道蟠旋麾於原上騁騏驥於途中又有
塞門隴坂之意也懿乎創物垂名俾傳來者登山臨水每
想古人亦何謝石門林泉峴首風景而已矣爲文斲石于
彼山阿時貞元十一年歲在乙亥九月九日記

東都留守顧公神道碑銘

洪維哲人含道研幾大方不器正得思惟磅礴山立危昂
鳳姿耽耽廣廈浩浩澄陂元化及物聖主爲時嘉猷式贊

密誥是司十餘年閒造膝詭辭顯仁藏用孰得而知天地
有公輔相其宜綜綱清轄揭禮高闢貂蟬莪莪親侍玉墀
帝思其人則曰汝爲乃齊九賦乃張四維清濁是分集於
靈龜祈祈名士天下觀頤正直摧剛誠明滅私孰云強禦
視若嬰兒量人氣折觸角用羸因智圖難尹正邦畿無念
鰥寡克宣明夷尼父有言裁者培之於赫斗樞迭爲官師
重光疊耀近古攸希分政於東宏訓保釐方俟元宰聿來
膺斯嗚呼不淑棟幹其萎神昧於仁胡可度思寵贈端右
恩覃澤垂元宇深邃龍光逶迤德音孔昭視我豐碑